



S Theater um d Elifante

Im Ziirkus kasch si nimme gsee
dr Dierschutz verbietet als wie mee.
Drumm muesch e Safaari bueche,
dnoo kasch si in Botswana sueche.

S nutzt dir au nyt in Zolli z goo,
wotsch d Risseldier gsee ummestoo
Iber Joore wiird us iirem Areaal
e Baustell Maargge 'Bäärg und Daal'.

Esoo verbaut men um d Elifanten umme
So nääbebyy e rächti Summe.
Scheneroosi Mäzeen hänn draa Gfalle,
dr Stutz in Hüffen aanezknalle.

Doch ooni die äint und ander Spänd
wäär jo dr Zolli scho lang am Änd.
Vyy! Bulfer muess elai no aane
zem s Ozeanium feertig z blaane.

Mängg Gheeg fir gmischti Hoorde
sinn unterdesse feertig woorde
E nei Haim hänn au d Affe bizooge,
ass si besser kenne spiilen (und sich blooge).

Kiirzlig het men ändlig denne
au d Baiz renoviert ereffne kenne.
D Famylie sell sich deert verpflääge,
Pyggnygge syyg hit voll drnääbe.

D Tembea isch glyy emol im Schuss,
hoffedlig isch jetz mit Baue Schluss.
Doch schaffe mecht me none Wältrekoord
So zaalsch halt Gettibatzen im Akkoord.

Als Bsuecher kasch wider unscheniert
dur dr Zolli schländeren inträssiirt,
ooni Baumaschiine, wo dien steere
kai Drägg me, kai Läärm isch z gheere.

D Elifante finde noo langen Umbaujoor
ändlig ins nei Areaal en offe Door
zem Bäädele, Frässen und Verwyyle.
D Wääärter blyybe duss und hyyle ...

... anderscht ebben as in frienre Zyte,
wo d hesch uf em llp no kenne ryte,
ooben uf em Buggel bisch stolziert
und d Wääärter hänn mit Hoogge gfiert.

Verbyy isch dä Spass, wel – ächt,
s syyg nämmlig nimme diergirächt.
Daarfsch no luege, suechen und entdegge,
wo die Dier sich dien verstegge!

Statt d Elifante goosch d Ladäärnen-Uusstellig uf em
Minschterblatz und d Waagen- und Reggwisyten-
Uusstellig bi dr Kasäärne vom Määntig znacht bis
am Mittwuch demoorge go bschaue..